

bertanggungjawab di atas segala perbuatan yang mereka lakukan selama mereka hidup di alam dunia ini. Pembalasan-pembalasan yang lebih berat pasti akan mereka terima sewaktu mereka telah berada di alam akhirat. Kalau mereka berbuat baik, maka kebaikan itu terpulunglah kepada diri mereka sendiri. Begitu pula sebaliknya, jika mereka melakukan kejahatan, maka kejahatan itu juga akan mereka terima pembalasannya. Setiap pembalasan yang mereka terima di atas dunia ini tidak akan menghapuskan pembalasan yang akan mereka terima di hari akhirat kelak. Dosa-dosa daripada perbuatan-perbuatan jahat yang telah mereka lakukan di dalam dunia tidak akan terhapus dan gugur melainkan setelah mereka bertaubat dan taubat mereka itu diterima oleh Tuhan.

Jika dibandingkan di antara syariah Islam dengan undang-undang dunia ciptaan manusia, maka keistimewaan syariah Islam itu lebih tinggi nilai dan mutunya, kerana syariah Islam mengandungi peraturan-peraturan yang memimpin seluruh manusia untuk hidup bahagia di dalam dua alam, iaitu alam dunia dan alam akhirat. Inilah di antara sebab-sebab yang utama sekali, maka syariah Islam itu dipatuhi oleh orang-orang Muslimin sama ada dengan secara sulit atau pun berterang-terangan: Lantaran mereka itu yakin dan percaya penuh kepada pengajaran-pengajaran dan peraturan-peraturan yang terkandung di dalamnya; serta bersesuaian pula dijadikan panduan hidup masyarakat manusia yang datang silih berganti dari suatu zaman ke suatu zaman; kerana taat itu adalah suatu ibadat yang menghampirkan diri seorang hamba dengan Tuhan yang

menjadikannya, dan orang-orang yang taat setia serta patuh kepada pengajaran-pengajaran yang dibawa oleh syariah Islam itu akan diberi pahala ganjaran yang tidak ternilai. Orang-orang yang berpegang teguh dengan pengajaran-pengajaran syariah Islam itu tidak akan berani melakukan perbuatan-perbuatan maksiat yang dilarang oleh agama Islam, lantaran mereka berasa gerun dengan pembalasan-pembalasan azab yang maha pedih yang akan mereka terima pada hari akhirat nanti dan mereka mengetahui yang mereka akan mendapat kemurkaan daripada Allah, bila mana kemurkaan Allah telah tiba, maka buruklah padahnya ke atas diri mereka.

Dengan adanya perasaan yang demikian, akan membawa kepada tambah berkurangnya perbuatan-perbuatan jahat; terpeliharalah keamanan dan terjaminlah peraturan hidup bermasyarakat. Bersalahan dengan kepatuhan dan ketaatan seseorang kepada undang-undang negeri, perasaan takut mereka kepada pembalasan-pembalasan dari undang-undang negeri itu tidak sebegitu mendalam menembusi jiwa. Seorang penjahat itu tidak akan teragak-agak untuk melakukan sesuatu perbuatan jahat kalau di dalam jiwanya hanya tersemat perasaan takut kepada akibat pembalasan dari undang-undang negeri yang mereka anggap ringan dan tidak berkesan itu.

Inilah yang menyebabkan bertambah banyaknya perbuatan-perbuatan jahat yang dilakukan oleh orang-orang yang tidak beriman, orang-orang yang tidak percaya kepada pengajaran-pengajaran yang dibawa oleh syariah Islam, yang menyebabkan rendahnya budi pekerti, akhlak dan moral di kalangan masyarakat hidup mereka sesama sendiri

(bersambung)

Cabutan

Sejauh-jauh terbang bangau akhirnya ke belakang kerbau juga dan akan sampai masanya akan menjadi saudara sendiri di Malaysia ini.-
Nasihat Tengku kepada pemimpin-pemimpin Melayu di Singapura.

*

Kalau hendak menarik kita bukanlah dengan ucapan-ucapan yang menggoreskan hati dan perasaan kita tetapi dengan amalan dan tauladan. – kata Tengku kepada pemimpin-pemimpin Melayu di Singapura.

*

Orang-orang Melayu Singapura bukanlah asing kepada orang-orang Melayu di Malaya, mereka adalah bersaudara dan mereka adalah sedarah daging, dan terpaksa berpisah kerana berlainan faham politik. – Tengku Abdul Rahman.

*

Tengku Abdul Rahman adalah meniupkan sentimen perkauman dan cuba menanam perasaan kepada orang-orang Melayu Singapura supaya membenci menteri-menteri Melayu mereka. – tuduhan Othman Wok

*

Untuk menyekat orang-orang Melayu Singapura daripada bersatu padu dengan orang-orang bukan Melayu, Tengku telah mengapi-apikan semangat perkauman mereka dengan mengatakan bahawa orang-orang Melayu di Malaysia dan Singapura tidak akan dapat dipisahkan oleh apa-apa kuasa sekalipun. – Othman Wok

*